



Inatsisartunut ilaasortaq, Jens Napâtôk, Naleraq  
Uani/

## § 37-mut apeqqummut nr. 135\_2020 akissut

Inatsisartut suleriaasianni § 37, imm. 1 naapertorlugu Naalakkersuisunut apeqquteqarputit. Apeqqutit akineqarnissaat uanga suliaasaqarfinnut innersuunneqarput.

24-08-2020  
Sags nr. 2020 - 13872  
Dok. nr.

Postboks 269  
3900 Nuuk  
Tlf. (+299) 34 50 00  
Fax (+299) 34 63 55  
E-mail: apnn@nanaq.gl  
www.naalakkersuisut.gl

### 1. Nunatsinni aalisariutini kilisaatinilu inuttaasartut qassiuppat?

**Akissut:** Angallatip angissusia aalisarnerullu qanoq-ittoq ingerlanneqarnera apeqqutaatillugit inuttat amerlassusaat nikerartarpoq. Misilittakkat malilugit inuttat allattorsimaffiisa, Kalaallit Nunaanni Aalisarsinnaanermut Akuersissutininik Nakkutilliisoqarfiup tigusartagaasa, takutippaat, inuit tallimaniit 35-t angullugit kalaallit aalisariutaanni inuttaasartut. Inuit katillugit 1200 miss. angallatini, inuttat allattorsimaffiinik nassiussisartuni, paarlakaallutik sulisarput, tassa imaappoq, Kalaallit aalisariutaanni inuttalersuisarneq pillugu Namminersorlutik Oqartussat nalunaarutaat nr. 13, 17. november 2011-meersumi § 1 naapertorlugu angallatit 24 meterinik sinnerlugilluunniit tamakkiisumik takissusillit.

### 2. Aningaasarsiaqarnikkut qanoq atugassaqartitaappat?

**Akissut:** Apeqqut manna akissallugu Aalisarnermut, Piniarnermut Nunalerinermullu Naalakkersuisoqarfik paasissutissanik pisariaqartunik pigisaqanngilaq. Aalisarnermi inuussutissarsiortunut saaffiginninnissaq innersuussutigineqarpoq.

### 3. Atorfeqartitaanerminni isumaqatigiissutitigut qanoq inissisimappat?

**Akissut:** Apeqqut manna akissallugu Aalisarnermut, Piniarnermut Nunalerinermullu Naalakkersuisoqarfik tunuliaqutassaqanngilaq.

4. **Nunatsinni kilisaatini aqumiut qassiuppat?**

**Akissut:** Inuttat amerlassusaat angallatip angisussia aalisarnerlu qanoq ittoq ingerlanneqarnersoq apeqqutaatillugit nikerartarpoq. Misilittakkat malilugit inuttat allattorsimaffiisa, Kalaallit Nunaanni Aalisarsinnaanermut Akuersissutinik Nakkutilliisoqarfiup tigusartagaasa, takutippaat aqumiut qulit sinnerlugilluunniit inuttaasartut.

5. **Kilissatini aqumiutut inuttaasartut kalaallit nunaanni najugallit qassiuppat?**

**Akissut:** Apeqqut manna akissallugu Aalisarnermut, Piniarnermut Nunalerinermullu Naalakkersuisoqarfik paasissutissanik pisariaqartunik pigisaqanngilaq.

6. **Kalaallit aalisariutaataanni inuttat katitigaanerat pillugu malittarisassat suut atuutsinneqarpat?**

**Akissut:** Kalaallit aalisariutaanni inuttalersuisarnek pillugu Namminersorlutik Oqartussat nalunaarutaanni nr. 13, 17. november 2011-meersumi § 1 naapertorlugu angallatit 24 meterinik tamakkiisumik takissusilinnut sinnerluguluunniit Kalaallit Nunaanni nalunaarsoqqasunut inuussutissarsiutigalugu aalisarnermut atorneqartunut nalunaarut atuuppoq.

Atorfinitsitsisup (ingerlatsiviup) akisussaaffigaa, inuttat nalunaarummi § 6-mi piunasaqaatit naammassisimaneraat. Kalaallit aalisariutaanni inuttat katitigaanerat §§ 2 aamma 3-mi erseqqinnerusumik killilersugaapput.

§ 2, imm. 1 naapertorlugu aalisariutini aqumiuusut minnerpaamik 60 %-ii Kalaallit Nunaanni najugaqartutut inuit nalunaarsorsimaffianni nalunaarsorsimassapput aamma Kalaallit Nunaanni inuit aqqisa nalunaarsorsimaffianni qaammatisiutit ukiuini kingullerni marlunni nalunaarsorsimassallutik. Ilanngullugu Kalaallit Nunaannut tamakkiisumik akileraartartussaataassapput qaamatisutillu ukiuini kingullerni marlunni Kalaallit Nunaanni tamakkiisumik akileraartartussaataasimassallutik.

§ 3, imm. 1 naapertorlugu inuttat sinneri aqumiuunngitsut, Kalaallit Nunaanni najugaqartutut inuit nalunaarsorsimaffianni nalunaarsorsimassapput aamma Kalaallit Nunaanni inuit aqqisa nalunaarsorsimaffianni qaammatisiutit ukiuni kingullerni marlunni nalunaarsorsimassallutik. Ilanngullugu Kalaallit Nunaannut

tamakkiisumik akileraartartussaataassapput qaamatisutillu ukiuini kingullerni marlunni Kalaallit Nunaanni tamakkiisumik akileraartartussaataasimassallutik.

Kalaallit Nunaanni Aalisarsinnaanermut Akuersissutinik Nakkutilliisoqarfik (KANUAANA) nalunaarummi angallatit ilaatinneqartunit inuttat allattorsimaffiiniq tigusaqartarpoq piumasaqaatillu naammassineqarnersut ataavartumik misissortarlugit. Inuttat allattorsimaffii aalisarnermi aalisarialernermik nalunaarummut siullermut ilanngullugu KANUAANA-mut nassiunneqartarput.

**a. Savalimmiormiunut aqumiorineqartartunut tunngatillugu immikkut malittarisassaqarpa imaluunniit isumaqatigiissuteqartoqarpa?**

**Akissut:** Apeqqut manna akissallugu Aalisarnermut, Piniarnermut Nunalerinermullu Naalakkersuisoqarfik tunuliaqutassaqaangilaq.

**7. Nunatsinni kilisaatini aqumiut maskinmesterillu kalaallit atornerqarnerunissaat anguniarlugu Naalakkersuisut suliniuteqarpat?**

**Akissut:** Ilinniartitaanermut, Kultureqarnermut Ilageeqarnermullu Naalakkersuisoqarfik ilisimatitsivoq, Imarsiornermik Ilinniartituarfiup siulersuisui 2018-ip qiteqqunnerani Ilinniartitaanermik Naalakkersuisoqarfiup, imarsiortutut inuussutissarsiuteqartut kalaallit kiisalu Imarsiornermik Ilinniartituarfiup akornanni pitsaanerusumik suleqatigiinnissaq siunertarlugu ataatsimiititaliamik pilersitsinissaq pillugu Ilinniartitaanermut Naalakkersuisoqarfimmut innersuussummik nassiussisoq.

Ilinniartitaanerit nukittorsarneqarnissaat pillugu kissaateqarnek aamma imarsiornermik inuussutissarsiornermut soqutiginninneq tunngavigalugit innersuussisoqarpoq.

Ataatsimiititaliamit ilaatigut makkua anguniarneqarput:

- Imarsiornermik inuussutissarsiornep ilinniartitaanerullu ataatsimoortumik pilersaarutigineqarnissaat.

- Imarsiortut aalisartullu kalaallit ilinniartitaanerannik ikiuinissamut inuussutissarsiuteqartut pisussaataitanerat suliffissamik qulakkeerinikkut kiisalu aqumiussat ilinniartitaanerannik pilersaaruteqarnissaat.
- Imarsiornermik Ilinniarfimmi naammassisunut inuussutissarsiortut naatsorsuutigisaminnik ersarissumik nalunaaruteqarnissaat kiisalu ilinniartut ilinniartinnissaannik qulakkeerrinninnissaq taamaasillutik naammassisut inuussutissarsiornermi naammattumik misilittagaqalerniassammata.

Ataatsimiititaliap immikkoortut qulaani taaneqartut suliarinerat ingerlappaat.

### **Ataatsimiititaliap killiffia**


Imarsiornermik ilinniartitaanerit nukittorsarniarlugit ilinniarfiup, inuussutissarsiuteqartut Ilinniartitaanermullu Naalackersuisoqarfiup akornanni suleqatigiinnissamut periarfissat pillugit ataatsimiititaliap ataavartumik ataatsimiittarnerminni oqaluuserisarpaat.

Suleqatigiinnerup maannamuugallartoq kinguneraa, Imarsiornermik Ilinniarfiup Nuummiittup K-Sim-imik aalisarnermut skibsbrosimulatorimik pisinermut inuussutissarsiuteqartut aningaasaliinermut isumaqatigiissuteqarfiginerat. Taanna ilinniarfimmi ikkunneqarpoq.

Peqatigalugu inuussutissarsiuteqartut umiarsuarni imarsiortunik kalaallinik ilinniartitaanermut akisussaaffik eqqumaffiginerulerpaat, taamaalilluni Imarsiornermik Ilinniarfimmi naammassisunut suliffissanik periarfissiillutik.

Ilinniartitaanermut Naalackersuisoqarfik piffissaq ungasinnerusoq isigalugu Nunani Avannarlerni (ilaatigut Danmark Savalimmiullu) imarsiortunik kalaallinik ilinniartitaanermut tunngatillugu suleqatigiinnissaq periarfissarsiorniarlugu misissuineramik aallartitsiniarpoq – ingammik Imarsiornermik Ilinniarfimmi neqeroorutaanngitsoq angallatinik naalagassatut ilinniartitaanermut

tunngatillugu – kiisalu Kalaallit Nunaanni Imarsiornermik ilinniartitaanerit  
ineriartortinneqarneranni suleqatigiissinnaanermut tunngatillugu.

Inussiarnersunaq inuulluaqqusillunga  
  
Jens Immanuelson

Aalisarnermut, Piniarnermut Nunalerinermullu Naalakkersuisoqarfik